

1574
1578

1585
1587

1588
1590

1584

1581
1573

1568
1534



✓ 00/17

alt. Nr. 261

Sprangenberg, Cyr.

in weitere 22 Schriften

K. IV. 45.

Kurze Antwort/

13

D. Jacobi Andree/auff

Herrn Johan Sturmij Buch/

Antipappus Quartus
genant.

7

Darinnen angezeigt wird / mit was greiff-
licher vnd erschreckenlicher blindheit Sturmijus
vnd andere Sacramentirer ge-
schlagen seien.

Allen fromen Christen/besonders der Christ-
lichen Gemein zu Straßburg/ zur
warnung geschrieben.



Gedruckt zu Dresden /
Anno 1581.

Dieß ist ein Buch

Dieß ist ein Buch

Das Buch ist ein Buch

Das Buch ist ein Buch

Das Buch ist ein Buch

Das Buch ist ein Buch

Das Buch ist ein Buch

Das Buch ist ein Buch

Das Buch ist ein Buch



Dem Edlen besten hochgelarten Herrn Lud-
wig Grempp von Freudenstein/ der Rechten Doctorn/ &c.
seinem großgünstigen lieben Herrn/ Bünescht Jacobus Andrea D.
gnad vnd friede in Christo Ihesu / sampt einem glück-
seligen Newen Jahre.

S Oler bester vnd hochgelarter / groß-
günstiger lieber Herr. Nach dem wir im nechstuorschie-
nen Monat Maio zu Marggrauen Baden/ vnserthal-
ben vngesehr/ aber vngeweißelt/ aus besonder schieckung
vnd vorsehung Gottes zusammen komen / Vnd vnter andern auch
des Herrn Iohan Sturmi gedacht worden / haben ihr auff mein be-
schehen frag (was sich doch gedachter Sturmius in seinem hohem al-
ter zeibe/ das er sich in die Religions streit der gestalt/ in offentlichen
schrifften / welche nicht seines beruffs sein/ vnd die er nicht verstehet/
einmenge) mir geantwortet/ ihr köndten euch selbst nicht gnugsam
darüber verwundern. Dieweil er vor vielen Jaren/ da er noch etwas
jünger vnd vormügentlicher gewesen/ sich darzu niemand vermögen
lassen/ Ob er wol deshalb mehrmals vermanet vñ gebeten worden.
Dardurch ich bewegt worden/ weil er in seinem Antipappo Quara-
to, meiner abermals/ wie des Pilatus im glauben/ doch mit offenbas-
ren landkundigen vngrunde gedacht/ ein kurze erinnerung/ so viel al-
lein mein Person belangt / von gedachtem seinem Buch zuschreiben.
Denn was die ausführliche widerlegung desselben belangt/ vngeweiß-
felt/ D. Oslander vnd D. Pappus ime nichts vergessen werden.

Welches ich darumb auch deutsch gethan habe/ auff das nicht
allein die gelerten zu Straßburg/ sonder auch die gemeine Bürger-
schafft/ besunders aber die in der Fischer zunfft doselbsten / sollich
auch lesen/ oder ihnen lesen lassen können/ Vnd daraus vernemen/
was Iohan Sturmius in geistlichen vnd glaubens sachen für ein
herrlicher fürtreffentlicher Mann seye / Der sich wider alle ihre ges-
trewe gelehrte auffrichtige beständige reine Lehrer vnd Prediger se-
hen / vnd ihr lehre vnd bekentnis / die auch vnser / ja der warhafftis-
gen

in Kirchen Gottes ist / so vnuerschambt / ohne allen grunde Gottes worts / in offentlichen Druck vor aller welt angreifen / vnd solche gewliche ergerliche spaltung erregen darff.

Demnach aber vnd weil ich von vielen Jahren her wol weis / das ihr ihe / als ein gelerten Man in Sprachen / herzlich geliebet vnd geehret / vnd wegen der langen vnd viel Jahr werender kundtschafft vnd freundschaft / so zwischen euch beyden gewesen / vor andern allen seinen Freunden viel an ihe vormögen / Hab ich nicht vnterlassen können / euch dis freundlich vnd dienstlich schreiben zuthun / vnd zu bitten / ihe den Herrn Sturmium doch freundlich zuerinnern (gleichwol nicht der meinung / das wir vns vor ihe in dieser sachen fürchten / sondern so viel an vns / ihe ein guten Namen bey menniglich / sonderlich aber den rechtglaubigen Christen zuerhalten geneigt / vnd nicht gern sehen / das er erst in seinem hohen Alter zu schanden werden solte) das er zu forderst Gott im Himmel fürchten / des Herrn Christi Testament / seiner Kirchen / auch seiner selbst schonen / vnd sich in solche Religions sachen nicht ferner mengen wolte / die er nicht verstehet / die auch nicht seines beruffs sein / darinnen er zu spot vnd zu schanden worden / vnd noch weiter werden würde / da er / wie er angefangen / fortfahren solt / welches ich ihe nicht gönnen wolte.

Sonderlich aber / das er die Christlichen Churfürsten / Fürsten vnd Stände Augsp. Confession besser in acht nemen wolt / deren widerholte einfeltige bekentnis ihres glaubens das Buch der Concordien ist / welches er so schimpfflich vñ lesterlich vnter dem Namen der Bergischen Väter / wie er sie hönisch nennet / ausgeruffen hat / Sonder bey sich selbst als ein geleterter Man bedencken / vnd ermessen / das ihe selchs keines wegs gebüre / auch vngeweißelt einem Erbarn Rath zu Straßburg hiermit kein gefallen geschehen ist.

Daran thut ihr dem allmechtigen ein angenehmen wolgefalten / dem Herrn Sturmio ein besondere freundschaft / Welchs gemeiner Stadt Straßburg zu ehren / derselben Kirchen vnd Schulen auch vngeweißelt zum besten dienen wirdt / Vnd bin ich euch jederzeit zu dienen mehr denn willig. Geben zu Dresden den 20. Decemb. 1580.

3
Das hat Johan
Sturmius/ Rector der hohen
schule zu Strasburg abermals ein
Lateinisch Buch im Truck ausgehen

lassen/ das er Antipappum quartum nennet/ Darin
nen er sich vnterstehet/ wider etliche Theologen Aug-
spurgischer Confession, besonders wider D. Pap-
pum, vnd Lucas Osiander sich zuuerantworten / so
gleicher gestalt in offnem Truck wider ine geschrieben
haben.

*Sturmius
Antipappus
Quartus.*

Der haupthandel aber/ darumb es vornemlich
zuthun/ vnd darüber sie vneinig sind/ ist dieser: Das
ermeltē Sturmius vñ seinen anhang verdrossen hat/
das in dem Christlichen Concordien Buch/ so/ Gott
lob/ nicht allein vnter der Kirchendiener/ sondern zu-
uorderst der Christlichen Churfürsten/ Fürsten/
Grauen/ Herrn vnd Stedte namen Augspurgischer
Confession zugethan / in öffentlichem truck ausge-
gangen/ die Calvinische Lere/ von etlichen vornemen
Hauptstücken Christlicher Lehr einhellig/ austrück-
entlich/ vnd öffentlich verdampft worden ist.

*Haupt vrsach
des Streits
zwischen Stur-
mius vnd den
Theologen.*

Ob er mich aber gleichwol auch beneben andern
getrewen reinen Lerern der Kirchen / so er mit hōni-
schen namen die Bergischen Peter nennet / ganz

A iij. heffig/

hessig / doch mit offenbaren vngrundt angegriffen.
Hab ich doch auff dismal hueruon gar nichts hand-
len / sondern dasselbig auff ein andere zeit / vnd bessere
gelegenheit sparen / vnd izunder allein die Summa
vnd den Inhalt seines Buchs fürnemen / vnd ine
mit demselben der ganzen Christlichen gemeine
zu Straszburg vorstellen wollen / Darmit nicht
allein ein Erbarer Rath / sondern auch ein ganze
Christliche gemein daselbst sehen mögen / was für
ein Man mehr gedachter Ioan Sturmius in Religions
vnd Glaubens sachen vnd geübter Christlicher Rit-
ter seie / Vnd da sie in zuuor nicht rechtkennen / jetzt
lernen mögen / was sie von diesem hochgelerten Man
halten sollen.

Sturmius
schreibt wider
das Concordie
Buch / das er
noch nicht ge-
lesen hat.

Dann nach dem dis ernstlich sein vornemen ist /
das er gern vorgedacht Buch der Concordien sampt
allen denen / die es gemacht vñ vnterschrieben haben /
ben allermenniglich vorhast machen wolt / schemet
sich der alte siebenzig jähig Man nicht nochmals
zuschreiben / das er dasselbig Buch noch nicht gelesen
habe.

Ist nu das war / wie ich es ime billich glauben
sol / so gebe ich allen Erbarn vorstendigen Leuten
zuerkennen / Ob er nicht würdig seye / vnd wol ver-
schuldet habe / das in seine Schüler in der obersten
Glasse nemen / vnd geben im mit einer handtvölligen
Ruthen /

Ruthen/ ein guten starcken schilling / das er darff/
 was nicht allein vnter so vieler Kirchendiener/sonder
 zuuorderst so vornemer Christlicher Churfürsten/
 Fürsten vnd Stände namen ausgegangen/ so lester-
 lich anziehen / vnd sich gleichwol noch so vnuor-
 schambt rhümen/ das er es nicht gelesen habe/ dessen
 sich ein geleter so alter vorlebter vnd weitberümbter
 Man in sein hertz hinein / vor Gott vnd den Men-
 schen billich schemen solte / wann einige scham oder
 Gottes furcht noch in jme were.

Zum andern / So viel das Hauptstück in der
 Lehr belangt / des wegen er mit dem Buch der Con-
 cordien vnd vns nicht einig ist / Nemlich / von dem
 hochwürdigen Sacrament des Leibs vnd Bluts
 Christi/ bestehet sein meinung / bekentnus vnd rath
 auff diesen dreien Artickeln.

Jo. Sturmij
 Bekentnus
 vñ Rath vom
 Streit vber den
 Artickel vom
 N. Abendmal.

Erstlich / Das man die Wort des Testaments
 Christi/ Das ist mein Leib ic. Das ist mein Blut ic.
 nicht verstehen sol / wie sie lauten / sondern man sol
 den rechten eigentlichen verstand in den schrifften der
 Altuatern vnd Kirchenlerern suchen / vnd sehen / wie
 dieselbige diese wort erkleret vnd verstanden haben.

I.
 Jo. Sturmij
 Glaube.

Zum andern / Schreibet er mit ausdrückent-
 lichen Worten / das die alten Kirchenlerer vnd Väter
 solche wort nicht in gleichem / sonder widerwertigen
 verstandt ausgelegt haben / Also / das dieser Streit
 aus

II.
 Herrlich zeug-
 nus Jo. Stur-
 mij von der
 alten Lere
 schrifften.



aus iren schrifften nicht könne entscheiden / oder hin-
gelegt werden.

III.
Nach Sturmij.

Zum dritten / Darumb habe der Hochgelarte
Mann Philippus Melanthon geraten / das Gelehrte
leute zusammen kommen / vnd sich mit einander vor-
gleich von Formis loquendi, das ist / wie man vff
ein einhellige form der rede vnd gleichlautende wort
schliessen möchte / das alle Lerer zu gleich einerley
wort gebrauchen / wann sie von diesem Sacrament
lernen / vnd gleichwol ein jeder sein eigen meinung / vnd
also widerwertige meinung darunter behalten / Dis
sey auch / seiner meinung nach / der enig vñ richtigste
weg zu der einigkeit / so in diesem streit möchte getrof-
fen werden.

Dis ist das Hauptstück vnd der inhalt seines
Buchs / darauff es / so viel diesen handel antrifft /
gantz vnd gar bestehet.

Examen
der bekentnis
Io. Sturmij.

Nun gebe ich allen frommen herzen / Hohes vnd
Niderstandts / Gelehrten vnd vngelernten / Lehrern vnd
zuhörern zuerkennen / was sie von diesem Mann / sei-
nem glauben vnd bekentnis halten sollen.

Sturmius
weist die leut
von Christi
wort auff men-
schen glos.

Der vns erstlich von den durren klaren hellen
worten des Testaments Christi / in der alten Kirchen
Lerer vñ Peter finstere vngewisse / vnd / seinem eignen
bekentnis nach / vngleiche vnd widerwertige schriff-
ten weist / als ob niemand kein rechten verstandt aus
den

den Worten Christi nemen / oder desselben gewis sein
könnte / der die Schrifte der Altveter und Kirchenle-
rer nicht zuvor gelesen hätte.

Darnach wann gleich einer diese zeit und arbeit
darauff wendete / das er solchen verstand in der Be-
ter Schriften suchen wolte / so bekennt Sturmius frey-
rundt / das die Veter selbst in auslegung dieser wort
nicht einig sein. Wer wil den ein solchen Menschē sa-
gen / welcher aus den Vetern vñ alten Kirchenlern /
den rechtē verstand getroffen hätte / dergestalt der ein-
selrig Christ / nach dieser arbeit in seinem glauben viel
ungewisser würde / denn er zuvor gewesen / ehe er der
Veter schriften gelesen hatte.

Sturmius
weist von
den gewissen
auff das un-
gewisse.

Lezlich aber auff das menniglich sehe / das dies
fer man ein lauter Epicurer seye / so bestetigt er Phi-
lippus Melanthon's Rath / man sol sich mit einander
in Worten vergleichen / wann schon der verstand der
worten unuergleichlich bleibe / vñ solchs sey der einig
weg zur beständigen einigkeit. Das kan mir doch ein
herrlicher rath sein / vñ da der Churfürst zu Sach-
sen vor fünff jaren gewust / das Sturmius so ein tref-
fentlichen Rath zu diesem werck hätte geben können /
S. Churf. G. inē hätte billich auch zu den Bergischē
Vetern beschrieben vñ seines dienst's gebraucht ha-
ben. Heist aber das nicht beides Gottes vñ der Men-
schen nicht allein im hertze / sondern auch mit Worten
offentlich gespottet

Ioh. Sturms.
ein Academi-
scher vñ Epic-
urer.

B **Dann**



Joan. Sturm
mius spottet
Gottes vnd
der menschen.

Dann ist so gar nichts daran gelegen / wie die-
ser vnseelig Man vorgibt / es sey einer dieser oder der
andern meinung / vnd glaubens / wann man allein
in Worten mit einander einig seye: So können die
Sacramentirer / die Galuinianer oder Zwinglianer
vor Gott nimmermehr verantworten / das sie ein
solch greulich ergernus vne not angerichtet / vnd die
Kirchen so jemerlich mit diesem streit vom hochwür-
digen Sacrament betrübet haben.

Ist aber vns Christen hoch daran gelegen / das
wir den einfeltigen rechten verstand der wort Christi
behalten / denn es sind wort seines Testaments / die
man nicht endern / noch anders verstehen sol / dann
wie sie lauten / darinnen von ernstlichen sachen ge-
handelt wird / so ist es abermals die höchste vngott-
seligkeit / an den Galuinianern / vnd an diesem alten
siebenzig ihärtigen Mann der grössste vnuerstandt
vnd vergessenheit / das sie so ein schlechte sach aus
diesem streit machen.

Antwort auff
Jo. Sturmij
Artickel.

Antwort auff
den ersten Ar-
tikel.

Demnach / vnd auff das aller kürzest / gründ-
lich dem Sturmio auff seine drey Artickel zuantwor-
ten. Sollen alle fromme Christen hoch vnd nider
Standt / Gelert vnd vngelert wissen / das Sturmij
erster artickel vñ aller seiner gesellschaft / anders nichts
sey / dann des Teuffels der alten Schlangen eingeben
vnd Stimme / vnd er derselben Aduocat, da er sagt:
das

Das man diese wort des Testaments Christi/ Das ist
mein Leib etc. nicht nach dem laut des Buchstabens/
sondern anderst verstehen sol / denn sie lauten / vnd
das man derselben rechten verstant erst in der Veter
schriffen suchen sol.

Jo. Sturmius
us des Teufels
Advocat.

Dann eben also vnd auff kein andere weise/ hat
diese alte Schlang der Teuffel Heua vnser erste Mut-
ter im Paradis betrogen / da sie sich lies von dem ein-
feltigem verstand des Gebots Gottes treiben / da
Gott sagt: Sie solten nicht essen von dem Baum des
erkentnus Gutes vnd Böses / sonst werden sie ster-
ben/ Die Schlang aber saget/ Ihr werdet mit nichte
des Todts sterben/ sondern jr werdet sein / wie Gott.
Deren sie glaubt/vnd sich selbst sampt iren nachkom-
men in eussersten Jammer gestürzt hatten.

Gen. 2.

Derwegen die vermanung S. Pauli allen
fromen herzen wol beuolen sein sol/ da er geschrieben
hat / Ich fürchte / das nicht/ wie die Schlang Heua
verfüret mit irer schalckheit / Also auch Ewere Sin-
ne verrückt werden von der einfaltigkeit in Christo.

Christen sollen
sich von der
einfalt nicht
abfären lassen.

2. Cor. 11.

NB.

Darumb las sich kein Christ von dem Text auff die
Glosa/von den gewissen/klarē / hellen/deutlichen ein-
feltigē worten Christi/auff ungewisse/ungleiche aus-
legung fürē/sondern bleibe bey den worten des Testa-
ments Christi/vñ bey dem einfeltigem verstand dersel-
bē/ vnd las dichs nicht irren/ das du diesen einfeltigen

B ij vorstand



2. Cor. 10.

Verstand mit deiner vornunfft nicht begreifen kanst/
sondern neme nach der Lere S. Pauli dein vernunfft
vnd menschlichen verstandt gefangen in dem gehor-
sam Christi / glaube seinem wort einfaltig / thu
nichts daruon / noch darzu / so bistu sicher in deinem
herzen vnd gewissen / vnd kanst nicht fehlen. Denn
es ist das wort des Allmechtigen Sons Gottes / der
die warheit selbst ist / der nicht liegen kan / vnd was er
redt / das vermag er auch zu leisten / daran ine kein
Creatur vorhindern kan.

Vngleiche
auslegung der
alten Kirchen
Lerer.

Sturmius
weist die leut
von Christo in
der Väter
Schrift.

Der ander Artickel ist alzu war / das Sturmius be-
kennet / die alten Väter vnd Kirchen lerer sein in der
auslegung der Wort des Testaments Christi nicht
einig / sondern das sie dieselbige in vngleichen ver-
stand ausgelegt haben. Weil dann dem / auch des
Sturmiij eigener bekentnus nach / also ist / gebe ich allen
rechtschaffenen Christen menschen zu erkennen / Ob
nicht Sturmius auch seinē natürlichen verstand verlo-
rē habe / das er vns in der Väter schriften weist / den
rechten verstand erst bey inen zuholen / von denen er
bekant / das sie in dem nicht enig sein? Heist das nicht
die leut vom Liecht in die Finsternis / vom gewissen / zu
dem / das vngewis ist / weisen?

Nu wird ein jeder Christ sich selbst zu bescheiden
wissen / wenn er höret / das die alten Kirchen lerer /
vnter sich selbst in der auslegung dieser wort nicht ei-
nig

nig seien/ Christus aber ist nit mit sich selbst vneins/
 So wir je auff eines teils wort gehen / vnd beruhen
 müssen/das es viel sicherer sey/ Wir glauben vn̄ blei-
 ben bey den einfeltigen dārren hellen klarē deutlichen
 Worten Christen einfeltig / denn das wir vns von
 seinem wort/auff der Menschen wort/vnd derselben
 widerwertige menschliche auslegung führen lassen?

Viel sicherer
 des Herren
 Christi wortē
 denn der Vā-
 ter schrifften
 zu folgen.

Dann es ist doch nur allein vmb dis einig stück
 zuthun/ daran sich die menschliche vernunft stößet/
 die nicht gerne etwas gleubet / sie könne es dann mit
 iren sinnen oder verstandt begreifen/ Wann Chri-
 stus das Brot nimbt/segnet vnd sagt/ Das ist mein
 Leib/ etc. das wir einfeltig bekennen/ Wir können
 solchs mit vnser vernunft nicht begreifen / Aber
 weil es Christus sagt / die Allmechtige warheit/
 das wir es einfeltig Glauben/ vnd seiner Allmacht
 befehlen/wie es zugehe/oder geschehen könne.

Der schwerest
 knot im Streit
 vom heiligen
 Abendmal.
 vnd
 Wie er zu
 überwinden.

Wz wir denn von dem hohen Artickel von Er-
 schaffung Himmels vnd der Erden nur ein einfeltiges
 wort haben / Das Moses schreibet : Im anfang
 schuff Gott Himmel vnd Erden/wie es aber zugegangen
 sey/das wissen wir nicht/ Wir glaubens aber/ Er
 hats gesagt / vnd es ist geschehen. Der nun das
 grösser vermag / der vermag auch das geringer/
 bey welchem nichts vnmüglich ist / Luc. am 1. Wer
 aber sich an dem einfeltigen wort Gottes nicht wil

Gen. 1.

B iij. settigen:



fettigen lassen/ der wirbt nicht allein von den einfeltigen Worten des Testaments Christi abweichen/ sondern auch alle Artickel vnsers Christlichen Glaubens verlieren/ die alle wider vnser vernunft seind.

Unchristlicher
rath Philippi
vnd Sturmijs.

Zum dritten/ das Philippus Melanthon gerathen/ wie leider das seine offenbare Schrifften ausweisen/ vnd Sturmius bestetigt hat/ Das gelerete Leut zusammen kommen/ vnd sich mit einander vber einerley form der reden vergleichen. Was bedarff es dieses Rathes? Dann gesetzt/ das alle Gelehrten aus der ganzen Christenheit zusammen kommen solten/ köndten sie auch eine bessere form der wort stellen/ dann wie sie Christus der Herr selbst geredt/ vnd die Euangelisten einhellig beschrieben haben? Wer wil besser/ deutlicher/ verstendlicher eigentlicher reden denn der Sohn Gottes? Der das wort des Vaters ist.

Kein Syno-
dus von nöten
das man sich
einerley form
der reden ver-
gleichet.

Vnd da sich gleich die Gelehrten einerley wort vnd reden mit einander verglichen/ vnd treten doch im verstandt nicht zusamen/ sondern behielten ein jeder sein meinung/ vnd füreten also widerwertige Leer vnd glauben/ vnter einerley Worten/ was were der Kirchen darmit geholffen? Weren nicht einfeltige Christen dardurch schendlich betrogen? Darbey abzunemen/ was für ein schendlicher/ vnd da es allein Weltliche Leibliche sachen anlangete/ ein vnerba-

vnerbarer vnchristlicher Raht das sey / den dieser
 Grammaticus für den einigen richtigen Weg zur
 Christlichen einigkeit vorschleht / Dardurch hohes
 vnd Niders standes Personen / fromme vnd Gotts-
 fürchtige Leut schendlich betrogen / vnd hinder das
 Liecht gefüret worden / Wie ich denn Sturmio zu sei-
 ner zeit etwas ausführlicher / da er es nit wissen wil /
 zum augenschein beweisen wil / Vnd ist offenbar /
 welcher gestalt / leider / die Caluinianer dieser zeit mit
 scheinbarn worten / vnd also / von der warhaftigen
 gegenwertigkeit des Leibs vnd Bluts Christi im
 heiligen Abendmal redē / das einfeltige frome hertzen
 nicht anders vermeinen / als hielten sie es mit vns /
 vnd als were deshalb kein streit vnter vns / sonder
 allein sonst ein haß vnd feindschafft / das wir nit mit
 einander stellen können / so sie doch darneben reden
 vnd schreiben : Das Christus Leib so weit vom
 Brodt des Abendmals sey / vnd bleibe bis an den
 Jüngsten tage / so weit der oberste Himmel von der un-
 tersten Erden / vñ das noch erschrecklicher zühörē ist /
 dz Gott mit aller seiner Allmechtigkeit vnmüglich sey
 zuuerschaffen / Das Christus Leib zu gleich im Hi-
 mel vnd auff Erden gegenwertig sey / oder sein könne.
 Ja das Christo vnmüglich sey nur zu wollen / das
 wir sein Leib mit dem Munde essen sollen. Darob
 sich ein from Christlich hertz billich entsetzen sol-
 le.

Scheinbare
 reden der Cal-
 uinianer.

Gotteslester-
 liche reden der
 Caluinisten.

I.

II.

Gotteslester-
 rung der Cal-
 uinianer wie-
 der Christum /
 vnd die All-
 mechtigkeit
 Gottes.

III.

Aus



Aus welchem alle Gottselige leut zuuernemen
haben/ was für ein vngelerter thörichter vnuerstän-
diger in heilliger Schrift vñ Göttlichen sachen vner-
farner Man Iohan Sturmius sey/ der sich eines sol-
chen hohen Bercks vnterwindet/ vnd so Kindisch
vnd lesterlich darvon schreibet/ das alle vernünfftige
Leut bekennen müssen / der Alte Man gehe in die
Aberwitz / vnd wisse selbst nicht/ was er rede oder
schreibe.

Johan Stur-
mius sol inn
sein Schul
Religirt wer-
den.

Wil dennach in kein zweiffel setzen/ wann from-
me hertzen diese kurze Erinnerung von seinem Buch
lesen/sie werden alle mit mir in dem einig sein / das
man ime das Handwerck niederlege/ von Religions
streitē weiter zuschreiben/dan er kans nicht. Darge-
gen aber ime in seine Schul schiecke/vnd lasse in daselb-
sten der Heiden Bücher den knaben vorlesen/darmit
er seine zeit zugebracht/ vnd die Jugend in sprachen
der Lateinischen vnd Griechischen Leren vnd vnter-
weisen sol.

Vnderschiedne
Gaben des H.
Geists in der
Kirchen.
1. Cor. 10.
1. Pet. 4.

Vnd erinnere in aus der Epistel S. Pauli/das
es vnterschiedene Gaben des heiligen Geists seyen/
mancherley Sprachen verstehn / Sprachen ausle-
gen vnd Weissagen / vnd Geister zu vnterscheiden/
vnd wisse/das S. Petrus die jenigen neben die Diebe
vnd Mörder an einen Rehen stellet / welche in ein
frembd ampt greiffen/ vnter welchen auch gezelt wer-
den

den sol ein Jurist / zu dem vns Ioannes Stürmius in
 seinem Buch weisen / den rechten verstand der wort
 Christi vom heiligen Abendmal zu holen / so allerley
 lester-schriefften zu vnsern zeiten wider vnser Christlich
 bekentnis / sonderlich aber wider das Buch der Con-
 cordi, im Truck ausgehen lassen / vnd nicht so Erbar
 ist / das er seinen Namen darzu bekennen darff / wel-
 cher zu seiner zeit / auch der gebür nach / sol zu gleich
 dem Sturmio empfangen / vnd wider in sein Barto-
 lum vnd Baldum gewiesen werden.

Sonderlich aber solten sich diese Grammatici, Ein jeder sol
 seines beruffs
 warten.
 Iuristen, Medici, vnd vermeinte Philosophi, so dieser
 zeit der Theologen Reformatores sein wöllen / erin-
 nern / vnd des Tags mehr dann einmal lesen / das ge-
 schrieben stehet im andern Buch Samuelis im 6. Cap. 2. Samu. 6.
 von Bsa dem Sone Abinadab / vber welchen des
 Herrn Zorn ergrimmet / vnd schlug in / das er starb
 bey der Lade Gottes / vmb seines freuels willen /
 darumb / das er zugreiff vnd die Lade Gottes hielt /
 da die Kinder befeit austraten.

Dann ime vnd seinem Bruder Achiozar von
 David beuohlen den newen Wagen zu treiben / den
 Leuiten aber / die Lade Gottes anzugreifen. Da aber
 Bsa in ein frembd Ampt getreten / vnangesehen / das
 er es vngeweißelt guter meinung vñ aus einem eifer
 gethan / jedoch weil es im nicht befohlen gewesen / ist
 S er vmb

er vmb seines freuels willen gestrafft / vnd auff dem
Platz getödtet worden.

Dieses vrteils haben sich auch diese Grammas-
tici, Iuristen, Medici, vnd vermeinte philosophi zuuer-
sehen / welche vermeinen / wañ sie nicht mit irem Bar-
tolo, Galeno, vnd Aristotile, iren Theologen zusprin-
gen / vnd vnter die arm greiffen / so würde nit allein die
Lade Gottes vmfallen / sondern die Christliche Kirch
vntergehen / wie solches an den Calvinisten zu sehen /
da in gegenwart vornemer Schur vnd Fürsten / die
Medici vnd Iuristen / den Calvinischen Theologen /
so gleichwol Doctores der heiligen Schrift gewesen /
die Argumenta zuvor eingiessen müsten / wie sie iren
Calvinischen schwarm verantworten sollen / In
massen denn sie solches nicht laugnen können / vnd da
sie so vnuerschampt weren, vñ solchs laugnen wolten /
desselben oberwiesen werden können. Aber wie die
Kirch ist / so ist auch der Pfarherr / vnd wie die Leer
ist / so hat sie auch verteidiger.

Der beste aber vnd sicherste / ja der einzig vnd rechte
weg ist / das ein jeder in seinem beruff bleibe / das
Abio vnd Vsa auff den wagen / der die Lade Got-
tes tregt / die Leuiten aber auff die Lade Gottes war-
ten. Das ist / das keiner weiter gehe / denn sein beruff
von ime erfodert / so wird es allenthalben recht zu
gehen.

Das

Das geschicht aber/wann die Iuristen des Rathshaus / die Medici ihrer profession vnd der Krancken/ die Schulmeister der Schul / vnd die Prediger des Predigstuls fleissig warten / so hat ein jeder gnugsam/ja seine hand vol zuthun/das er sich eines frembden Ampts nicht annemen wird.

Wann aber die Iuristen Pfaffen sein / vnd den Predigstul regieren / vnd viel besser denn die getrewen Kirchendiener wissen wöllen / was man leren / vnd wie man die Leere verteidigen sol / vnd widerumb die Pfaffen Regenten sein / vnd der Regierung vorschreiben vnd maß geben wöllen / wie sie in allen vorfallenden sachen vrtheil sprechen sollen / da wird beides in der Kirchen Gottes vnd auff dem Rathhaus / oder in der Regierung vbel hauszgehalten.

Ben vermischung der beuiff vnd ämpten Echs segens Gottes.

Es sol wol ein jeder Christ / was stands er ist / wissen / was er glauben oder nicht glauben sol / vnd da es von ime erfodert / schriftlich oder mündlich seines glaubens bekantnus von sich geben / vnd denselben verantworten können / nach eines jeden gaben / die ime von Gott gegeben ist.

Wie weit sich ein Christ / der kein Prediger ist / der Religion annemen sol.

Aber sich dessen vnterwinden / das den Predigern vnd Leerern zu gehöret / das ist Gott so angenehm / als da sich Chore Abyron vnd Datan wider Mosen vnd Aaron setzten / vnd sagten zu inen / ir machts zu viel / denn die ganze gemein ist vberal heilig. Von
S ij welchen

Exempel der straffe / denen / die inn ein frembd Ampt greiffen. Num. 16.



welchen geschrieben stehet / das die Erden vnter inen
zureiß / iren mund auffgethan / vnd sie verschlungen
habe mit iren heusern / mit allen menschen die bey Ko-
rah waren / mit aller irer habe / das sie hinunter leben-
dig in die Helle furen. Dann diß sind eben auch dieser
Galuinischen Grammaticorum, Juristen, Medicorum,
vnd vermeinten Philosophen reden / das sie sagen / die
Luterischen Pfaffen machen es zuuiel / sind wir nicht
alle Christen? solten wir nicht so wol diese glau-
bens vnd Religions streit entscheiden können / als
die Pfaffen? vnd was dergleichen mehr freueler re-
den sein.

2. Cron. 28. Item / Es ist dieser ir freuel Gott so angenehm / als
da Bria der König Reuchert / welchen Gott als bald
geschlagen / das er sein lebelang aussetzig sein muste.

Diese Exempel wollen solche vnselige Gramma-
tici, Juristen / Medici, vñ vermeinte Philosophi (dañ
die andern wil ich hiermit keines wegess gemeint
haben / die in ihrem Göttlichen beruff bleiben / vñnd
demselben treulich auswarten) wol mercken vnd zu-
herzen fassen / vnd sich darbey erinnern / das ein jeder
in seinem beruff bleibe / demselben fleissig abwarte /
darneben Gottes Wort fleissig höre / lese / bete /
vñnd lasse das vberig die Kirchendiener verrich-
ten / so darzu beruffen sind / das sie die warheit mit
grund Gottes worts vertheidigen / wie geschrieben
stehet:

stehet: Des Priesters lippen sollen die lehr bewaren/ *Mal. 2.*
das man aus seinem munde das gesetz suche/ denn er
ist ein Engel des Herrn Zebaoth. So sollen sie wiss
sen/ das sie Gott segnen werde.

Also hatt auch die Stad vnd hohe schul zu
Straßburgk ihre Kirchendiener/ die gelert/ vnd
trew in irem Ampt sein/ vnd wissen die vngeweißelte
warheit mit beständigem grund Gottes worts / ge
gen allermenniglich zuuerantworten / Die mit dem
Buch der Concordien / welchs in der Christlichen
Churfürsten / Fürsten vnd Stende Augsp. Confes
sion, wie auch derselben Kirchendiener einhellig be
kantnus/ Gott lob / durchaus alle sampt einig sein/
dasselbig auch mit iren eigen handen/ nicht aus leicht
fertigkeit / sondern wol bedacht / vnd mit gutem
vnuerletztem gewissen vnterschrieben/ als das durch
aus in allen Artickeln mit dem reinen wort Gottes
vberein stimmet/ die auch so mechtig sind/ durch die
gnade vnd krafft des heiligen Geists/ vnd mit dem
wort Gottes also gefast/ das sie dis fals Sturmiñ oder
seines gleichen Schulmeister hülff nicht bedürffen.
Sondern er las ime geniegen/ das er die Ochsen vnd
den Wagen getrieben hat/ so die laden Gottes tregt/
das ist / Er hat D. Iohan Pappum, als er sein Disci
pulus vnd Schüler gewesen / in den Sprachen vnd
freien Künsten / Gott lob / also abgerichtet / das er

Unterscheid
zwischen Joa.
Sturmiñ vnd
D. Pappus
beruff.

§ iii jekund



jetzund dieselbige Waffen oder Werkzeug Gott zu ehren/ zu erklerung vnd ausbreitung der Göttlichen warheit/ vnd zu widerlegung der Irthumb vnd falscher Lere / auch wider seinen Præceptorn Ioan Sturmium vnd allermenniglich / nützlich gebrauchen kan/ Das Sturmius nicht thun kan / darzu auch er in der Kirchen zu solchem Ampt beruffen ist / vnd nicht Sturmius, sondern Sturmius sol in der Schul bleiben/ vnd seinem Ampt fleissig auswarten / vnd solcher junger Pappos viel auffziehen / vnd sich an diesem seinem beruff genügen lassen / so wird er von allen gelerten menschen hoch gehalten vnd gerhümet werden. Vnd da er auch rechte erkentnus Gottes hat/ vnd solches alles aus glauben gethan / den ungezweiffelten lohn auch im Himmel empfangen. Wie es dann noch nicht zu spät ist / wann er umbkehret/ vnd nicht nur in zwanzig Jahren einmal/ sondern fleissig viel vnd offft zur Predige gehn/ vnd der Jugendt hiermit ein gut Exempel vortragen / vnd hinfort der einfalt Göttlicher warheit nicht mehr sich widersetzen/ sondern seine Schüler auff dieselbige anweisen würde/ vnd sich ferner dessen nicht annemen / das seines beruffs nicht ist/ vnd das er nicht gelernet hat / wie er dann augenscheinlich sihet / das er es nicht kan / sondern da er also fortferet / wie er vbel angefangen hat/ vor Gott vnd den Menschen noch mehr in spot vnd schanden sich setzen wird. Das

12
Das hab ich dir / lieber Sturmi / zum gluckseligen
Newen ihar schreiben wollen / weil ich nicht erachten
können / das ich dir eine heilsamere gabe schicken mög-
gen.

Welche ich verhoffe dir darumb sol so viel desto
mehr angenehm sein / weil dir meiner / wie auch ande-
rer meiner mitbrüder dienst nicht zuwider gewesen /
sondern wol gefallen hat / den ich unwirdig Anno 16.
63. zu Strasburgk nicht allein dir / sonder Kirchen
vnd Schulen daselbsten / zum besten / geleistet /
dadurch Gottes gnade / die ergerlichen vnd gefehr-
liche zwispalt zwischen dem ganzen Ministerio / ab-
len Kirchen vnd schuldienern verglichen / als der vn-
selig man D. Zanchus / beides kirchen vnd schul / vnd
gemeine Stadt schier in ein hauffen gestossen / gleich-
wol / da er seine vordampfte leer von der verfehlung
Gottes / das Gott den grössern theil der menschen /
in seinem ewigen Rath / zum verdammnis verordenet
haben solte / nicht verthedigen können / vnd die vor-
gleichung / so damals gemacht worden / angenom-
men / als bald / da du ihne vnter den armen / wie eine
braut / zum Tisch furtest / vnd batest / das er solt vn-
terschreiben / dis stücklein bewiesen / vnd mit nach-
folgenden worten unterschrieben / Hanc Confessio-
nem V. T. piam iudico, I. T. A. eam subscribo. Das ist /
Diese bekenntnis / wie ich sie für gottselig halte / Also
vnter

*Hieronymus.
Zanchus.*

unterschreibe ich sie. Das ist so viel / als nichts / wie
er hernach bewiesen hat / Bey welchem einigen böß-
haftigen stück / du doch den Galuinischen Geist het-
test sollen lernen kennen / vnd sich denselben nicht wei-
ter verführen oder verleiten lassen.

Warnung vñ
vermanüg an
Sturmium.

Der allmechtige Gott bekere dich / vnd da du
solches thust / werden ungezweiffelt dir auch balde
vergeben / die du mit dieser vnd deinen vorgehenden
schrifften beleidiget hast. Welches du so gar nicht
für dich selbst gethan / das ich ganz vnd gar in kei-
nen zweiffel setze / wenn dich nicht vorneme Perso-
nen / so ich leichtlich errathen wolt / wer sie sein / dar-
zu vermocht vnd angehezt / solches in deinem hohen
alter mit deinem grossen lob vnd rhum / wol verblie-
ben were : die verhoffet haben / du soltest es besser
können / vnd auch besser gemacht haben. Welches
dir doch unmöglich gewesen / weil du wider die
Göttliche warheit geschrieben hast. Denn wer wi-
der die warheit schreiben wil / nichts denn lügen
schreiben kan. Vnd da du fortfahren soltest / das ich
dir nicht gönne / wider den stachel lecken / vnd endlich
auch die erschreckliche stim Ihesu Christi würdest
hören müssen / da er sagt : Saul Saul / was verfolg-
stu mich : Es wird dir schwer sein wider den stachel
lecken / Actor. 9. Welche alle die jenigen zugewarten
haben / die sich der Göttlichen warheit widersetzen /
Dar

Darfür dich der Allmechtige behüte / das ich dir
 auch von grund meines hertzens wünsche / Vnd
 dich zum beschluss doch nur noch eines erinnern
 wollen / Das du bey dir selber wol bedenccken / vnd
 vns nicht für solche Stöck vnd Blöck halten
 wollest / das wir nicht sehen / schmecken / riechen / vnd
 greiffen köndten / das brot brot / vnd wein wein sey /
 vnd das es ganz vnd gar keiner kunst / besonders
 aber deines schönen vnd herrlichen lateins hierzu
 nichts bedarff / vns desselben zubereden / denn kein
 Bauer so grob ist / der das nicht glaube vnd ver-
 stehe.

Erinnerung
 an Jo. Stur-
 mium.

Grosse weis-
 heit vnd kunst
 der Sacra-
 menter.

Dargegen aber solstu wissen / das vns allein die
 wort des Testaments Christi am wege stehen / das
 er das Brot genommen / gesegnet / vnd gesagt hat /
 Nemet / esset / das ist mein Leib. Desgleichen den
 Kelch / Nemet / trincket / das ist mein Blut etc. des
 neuen Testaments. Vñ nicht des alten Testaments /
 darinnen allein figuren / zeichen / vnd fürbildungen
 gewesen sind. Sondern in diesem Sacrament des
 neuen Testaments / ist iezunder gegenwertig / was
 in den Sacramenten des alten Testaments vorge-
 bildet worden ist.

Was frome
 Christen auff
 halte / das sie
 nicht können
 noch sollen
 Caluinisch
 werden.

„
 „
 Was für blut
 im Sacramēte
 des neuen
 Testaments
 seye.

D Desglei



Desgleichen soltu auch wissen/ das wir nicht so
vngelert / vnd vnfleissig sein / das wir nicht solten/
besonders in so hefftigem streit der Kirchendiener/
gelesen haben die auslegung dieser wort/ wie sie die
alte Kirchenlerer erkleret haben.

Einfeltigkeit
der alten Kir-
chenlerer.

Welche/ ob sie wol geschrieben haben/ das das
Brod sey ein zeichen/ ein figur/ ein bildnis oder be-
deutung des Leibs Christi/ hiermit den vnterscheid
zwischen dem Element des brods / vnd dem Leib
Christi/ nach der leer vnd exempel S. Pauli anzu-
zeigen/ 1. Cor. 10. so wirst doch weder du / noch kein
Caluinist in alle ewigkeit aus ihren schrifften erwei-
sen/ das sie glaubt oder gelert haben solten/ das
nichts mehr denn brod sey/ vnd der Leib Christi im
heiligen Abendmal nicht gegenwertig sein solte / wie
D. Luther vor 52. jaren den Sacramentirern in sei-
ner grossen bekentnis den trutz geboten hat/ das sey
dir vnd allen Caluinisten auch nochmals gesagt/
welchs gleichwol gegen deiner person nicht grosse
arbeit bedarff/ weil du selbst bekennest / das dir die
Väter etwas zu starck von dieser gegenwertigkeit
vnd niessung des Leibs Christi im H. Abendmal ge-
redt haben/ die mit dem munde geschehe.

Du wollest auch hierbey mit allem vleis/ vnd in
der furcht Gottes bedenccken / wohin doch entlich
deine

Deine gesellen vnd glaubensgenossen gerathen sein/
 weil sie/ deinem erbar rath nach/die wort des Testa-
 ments Christi nicht verstehen sollen/ wie sie lauten/
 das sie nach der weissagung D. Luthers/ so vor 52.
 Jahren geschehen / so lang den verstandt dieser wort-
 ten in den alten Vätern vnd iren schrifften gesucht/
 bis sie entlich in grosser anzal zu Arrianern vnd
 Mahomatisten worden sind/ vnd die ewige Gott-
 heit Christi verleugnet haben/ Seine wort lauten
 also: Vnd du solt sehen/ weil sie auff der bahn ge-
 hen/das sie Gottes wort wollen nicht mit dem glau-
 ben ehren/ oder nach einfeltiger weise der sprachē an-
 nemen/ sondern mit der Sophistisckē vernunft vnd
 spitziger Subtiliteten messen vnd meistern/ werden sie
 gar fein dahin kommen/ das sie auch leugnen wer-
 den/CHRISTVS SEY NICHT GOTT. „ „
 Denn bey der vernunft laut es ja so thöricht: „ „
 MENSCH IST GOTT. Als. BROD IST „ „
 LEIB. Vnd weil sie eins leugnen/ werden sie gar „ „
 bald vnd frisch DAS ANDER AVCH „ „
 LEVGNEN. Das sucht auch der Teuffel der „ „
 sie AVS DER SCHRIFT inn ihre VER-
 NVNFT gefüret hat / das er alle alte Ketzerey
 wider herfür bringe. Bis daher Doct. Luthers
 wort.

Warnung für
 den Calutnia-
 ner / vnd wo-
 hin sie entlich
 gerhaten.

19

D. Luthor
 im andern
 theil wider
 die Himlische
 Propheten.

D H Vnd



Vnd dasselbige geschehen vnd leider erfüllet sey/
du nicht leugnen kanst/dan die exempel hastu vor der
thür gehabt/das du sie nicht weit in Siebenbürgen/
Hungern/ Poln/ oder anderswo vnter ewers glau-
bensgenossen suchen darffst/deren Kirchen Consens
vnd einigkeit ihr euch vielfeltig rhümen. Da sie
leider mit grossen hauffen zu finden/welche alle zu-
vor Saluinisch gewesen sind.

Diz einig stück/solte dich doch/wie auch andere
deines Glaubensgenossen bewegen/vnd euch das
nachgedencken machen/ das jr/nach dem Rath S.
Pauli (der besser ist denn deiner vnd Philippi Me-
lanchtons Rath) Ewer vernunft vnd verstand ge-
fangē nemen in den gehorsam Christi/so were schon
durch Gottes gnade/friede.

So ist dir auch vnuerborgen/das die Galuinia-
ner nicht nur diesen irthumb haben/wie etliche be-
trieblich vnd ganz verschlagen vorgeben/ vnd ein-
feltige Leute darmit betriegen/sonder noch viel ande-
re/vnd vnter denselben viel erschrecklichere/dann dies-
ser vom Sacrament ist/nemlich.

Grewls

15

Grewliche vnd Got- teslesterliche Irthumb der Caluinisten.

I.

Das Gott den größern teil der Menschen / in
seinem ewigen Rath zum verdammus ver-
ordnet habe / das sie nicht können selig wer-
den / sonder müssen ewiglich verdampt werden.

II.

Das nicht alle Kinder in der H. Tauff wider-
geboren werden / sonder allein die Kinder / die in dem
ewigen Rath Gottes / zu dem ewigen leben erwelet
sind.

III.

Das auch solchs nicht geschehe allezeit bey
diesem wasserbad / sonder solche wiedergeburt ges-
chehe offtermals erst im alter. Darumb auch die
H. Tauffe nur ein zeichen oder fürbildung / sigel vnd
zeugnisse der wiedergeburt sey / gleich wie das Brod
im H. Abendmal ein figur oder zeichen sey des Leibs
Christi.

E Das

III.

Das Christus Menschliche Natur in alle Ewigkeit der Allmechtigkeit Gottes / weder theilhaftig noch fehlig sey. Dann das schicke sich so wenig / vnd sey so vngereimt / als wenn man sagte / ein stein könne in die Schul gehen / vnd lernen / oder einem Klotz könne man weisheit vnd lere eingiessen.

V.

Das des Herrn Christi Leib vnd Seele / auch der Name vñ Tittel der Allmechtigkeit nicht gebüre / noch mit warheit derselbigen zugeschriben werden könne.

VI.

Das Christus / ist in seiner herligkeit / mehr nicht wisse / denn ihme gebüre zu wissen / vnd ihme von nöthen sey zu wissen. Aber alles wissen / das Gott weis / das were weder seinen menschlichen Geist / noch einiger Creatur in alle ewigkeit mit geteilet / könne ihr auch nicht mitgetheilt werden.

VII.

Christus habe / nach der Menschheit / ein größern gewalt denn die Engel / vnd andere selige menschen / vnd ein kleinern gewalt / denn Gott. Aber mit der allmechtigkeit Gottes / weder theil noch gemeinschaft.

Das

VIII.

Das Christus / nach seinem menschlichem Geist so viel erkentnus Gottes habe / als ihme Gott offenbare.

IX.

Das Christus / wie ein anderer mensch von Marien geborn / vnd ob sie wol von keinem Man empfangen habe / so sey doch ihr Jungfräwlicher Leib nach seiner geburt nicht vnuerferet geblieben.

X.

Das Christus durch den Grabstein / oder durch die verschlossene Thurn nicht gegangen sey / noch habe komen können / mit seinem leibe.

XI.

Das die menschliche Natur Christi / vns durch ihr leiden erlöset habe / vnd das der Sone Gottes / im leiden mit ihr nichts gemein gehabt habe.

XII.

Das man die lehr / so die Göttlich warheit ist / mit gutem gewissen nicht vnterschreiben könne / sie sey dann in einem Concilio zuuor approbirt vnd für recht erkant worden.

XIII.

Das die vnterthanen / wenn sie glaubens halben durch ihre Obrigkeit angefochten / sich wider ire

E u Obrige



Obigkeit setzen / vnd so starck sie sind / mit dem
schwerdt sie bekriegen dürffen / so lang / bis sie ihnen
frieden in der Religion zusagt / vnd derselb gnugsam
versichert vnd bestetigt wirdt.

XIIII.

Das man die Ketzer / wann sie eines Irthumbs
oberweisen / vnd sich nicht wollen wiesen lassen / mit
dem feuer oder schwerdt richten sol.

Wann nun zu diesen Artickeln / auch die
drey obgemelte erschrockenliche Gottes lesterliche
Artickel gesetzt werden / Nemlich :

I.

Das Christus leib so weit vom brod des Abend-
mals sey / vnd bleibe / bis an den jüngsten Tag / so
weit der Oberste Himmel von der vntersten Erden ist.

II.

Vnd / das noch erschrecklicher zu hören ist / das
Gott mit aller seiner Allmechtigkeit vnmüglich sey
zuuerschaffen / das Christus leib / zugleich im Himmel
vnd auff Erden gegenwertig sey / oder sein könne.

Ja das

III

Za das Christo unmöglich sey / nur zu wollen / das wir sein leib mit dem Munde essen / vnd sein blut mit dem Munde trincken sollen.

Was köndte doch / Christlicher leser / greswlichers vnd erschröcklichers gesagt werden? Dann das in diesen Artickeln die Calvinianer öffentlich bekennen / vnd ihren Armen zuhörern für die Göttlich warheit verkauffen / vnd sie also nicht allein omb leib vnd gut bringen / sonder sie in das ewig Helligsch ferwer setzen / nach dem wort Christi: *Matth. 23.* Wehe euch Schriftgeler ten vnd Phariseer vnd heuchler / die ihr Land vnd Wasser umbzieheth / das ihr ein Zud genossen machet / vnd wenn ers worden ist / machet ihr aus ime ein kind der Hellen / zwifeltig mehr / denn ir seidt. *Matth. 23.* Gleiche gestalt hats mit den Calvinianern.

Das wir geschweigen / was sie von Gottes wesen selbst für menschliche törichte fanteseyen vnd gedancken haben / das nicht das wesen Gottes oder Gott selbst wesentlich in allen Creaturen gegenwertig sey / sondern allein sein krafft vnd wirkung / Als wann ein ander ding were Gottes gewalt / vnd ein anders Gottes wesen. Der vrsach D. Luther von inen vor 52 Jaren geschrieben hat / das sie nicht allein kein Artickel von der Person Christi / sondern auch von Gott vnd seinem wesen gar nichts glauben / vnd sey es darzu von inen in seinem herzen gewis.

Matth. 23.

I.

Im buch / das diese wort / Das ist mein Leib etc. noch fest stehen.

Welche



Welche Artickel ich hie zu ende erzelen wöllen/
vnd da sie einen vnter denselben leugnen wol-
ten/ sie mit ihren eigenen schrifften oberweis-
sen will. Auff das alle fromme Christen doch dies-
sen Geist lernen kennen/ vnd sich wissen vor ihme
zuhüten / als der aus einem irthumb in den andern
füret. Wie sie sich dann noch anderer mehr greulicher
Irthumb vernemen lassen / die sie auch ausschütten
würden / wann sie bessern windt hetten / Als: das
Christus nicht nach der angenommenen Menschheit/
sonder allein nach der Gottheit das letzte gericht hal-
ten werde/ Item: es sey so hoch nicht daran gelegen/
wan wir gleich das Abendmal Christi nicht hetten:
Vnd dergleichen anders mehr / bis die armen
leut endlich von Gott gar abgefallen / vnd
in das ewig verderben gerathen/ Daur
der Allmechtige alle frome hertzen
behüten vnd bewaren
wolle/Amen.



Dresden.

Gedruckt durch Matthes Stöckel.


M. D. LXXXL

[Faint, mirrored text, likely bleed-through from the reverse side of the page]



[Faint text at the bottom of the page, possibly a signature or date]






153450

ULB Halle 3
004 342 046




Sb.





ALIA TIBI SVB VLYCIS IN MEN
TO TIBI SVB ET ALVNDOS
QVOSV LVN TERE AE PAVI
DV SSE DIO S



13
Kurze Antwort/
D. Jacobi Andree / auff
Herrn Johan Sturmij Buch/
Antipappus Quartus
genant.

Darinnen angezeigt wird / mit was greiff-
licher vnd erschrecklicher blindheit Sturmijus
vnd andere Sacramentirer ge-
schlagen seien.

Allen fromen Christen / besonders der Christ-
lichen Gemein zu Straßburg / zur
warnung geschrieben.



Bedruckt zu Dresden /
Anno 1581.